

## Wokovu wa Watoto

*Hata mtoto bujijulisha kwa matendo yake; Kwamba kazi yake ni safi, kwamba ni adili—*  
**Mithali 20:11.**

**K**ujifunza kwingi na kuomba kwa bidii kwa ajili ya hekima ya mbinguni vinahitajika ili kujua namna ya kushughulika na akili za vijana, kwa maana mengi hutegemea sana mwongozo wa wazazi wanaouweka kwenye akili na dhamira za watoto wao. Kufanya akili zao kutenda kwa uwiano katika mwelekeo ufaao na kwa wakati unaofaa ni kazi ya muhimu zaidi kwa maana hatima yao ya milele inaweza kutegemea maamuzi yanayofanywa wakati fulani muhimu. Basi, ni muhimu jinsi gani kwamba akili za wazazi ziwe huru kadiri iwezekanavyo mbali na mfadhaiko, mahangaiko yachoshayo katika mambo ya kitambo, ili waweze kufikiri na kutenda kwa fikra tulivu, hekima, upendo, na kuufanya wokovu wa nafsi za watoto wao kuwa jambo la kwanza na la muhimu mno! Kusudi la juu ambalo wazazi wanapaswa kutafuta kulifikia kwa ajili ya watoto wao wapendwa linapaswa kuwa uzuri wa ndani. Wazazi hawawezi kuruhusu wageni na watu wasiowajua wachukue umakini wao na kwa kuwapa muda wao, ambao ni mtaji mkuu wa maisha, wakifanya isiwezekane kwao kuwapa watoto wao kila siku mafundisho hayo yenye subira ambayo lazima wawe nayo ili kutoa mwelekeo sahihi katika akili zao zinazokua.

Maisha ni mafupi mno hayatakiwi kutumiwa vibaya bila mafanikio na kwa namna isiyofaa, kwa kutembeleana bila faida, kwa mavazi yasiyo ya lazima kwa ajili ya maonesho, au burudani za kisisimua. Si sahihi hata kidogo kutumia vibaya muda tuliopewa na Mungu ili kuwabariki wengine na kujiwekea hazina mbinguni. Hatuna muda mwingi wa ziada ili kutekeleza majukumu muhimu. Tunapaswa kutumia muda katika utunzaji wa mioyo na akili zetu wenyewe ili kwamba tuweze kufanywa kufaa kwa ajili ya kazi yetu ya maisha. Kwa kupuuza haya majukumu muhimu na kufuatana na tabia na desturi za mtindo ya jamii ya kidunia, sisi na watoto wetu tunajifanyia kosa kubwa mno...

Ni wajibu wa wakina mama kuendeleza akili zao na kuifanya mioyo yao kuwa safi. Wanapaswa kuboresha kwa kila njia wawezayo kwa ajili ya maendeleo yao ya kiakili na kimaadili, ili waweze kufaa kustawisha akili za watoto wao. Wale ambao wanaendeleza tabia yao ya kuwa pamoja na wengine hivi karibuni watahisi kukosa utulivu kwa kukosa kutembelea au kukaribisha wageni kwao. Hao hawana uwezo wa kukubaliana na hali ya mambo inavyokuwa. Majukumu muhimu na matakatifu ya nyumbani huonekana kuwa ya kawaida mno na yasiyowavutia. Hawapendi kujipima au kujinidhamisha. Akili inatamani matukio mbalimbali, ya kisisimua ya maisha ya kidunia...

Ikiwa wazazi wangehisi kwamba ni wajibu madhubuti walioamuriwa na Mungu ili kuwaelimisha watoto wao kwa manufaa katika maisha haya; ikiwa wangelipamba hekalu la ndani la nafsi za wana na binti zao kwa ajili ya uzima wa milele, tungeona mabadiliko makubwa katika jamii kwa ajili ya wema

(Testimonies for the Church 3:146, 147).